

**MESYUARAT KEDUA PENGGAL KEDUA  
DEWAN UNDANGAN NEGERI PULAU PINANG  
YANG KELIMA BELAS  
22 NOVEMBER 2024**

**PERKARA : 5(B)70**

**SOALAN LISAN OLEH AHLI KAWASAN PERMATANG BERANGAN  
YB MOHD SOBRI BIN SALEH**

70. Pencemaran Sungai Kereh dengan najis babi masih berlaku. Masyarakat sangat kesal dan marah atas kegagalan Kerajaan Negeri Pulau Pinang dalam menyelesaikan isu ini.
- (a) Apakah perkembangan loji biogas yang dicadang untuk memproses najis babi ini bagi menghasilkan tenaga elektrik?
  - (b) Adakah Kerajaan Negeri mempunyai cadangan lain bagi menyelesaikan isu ini?

**YB DATO' SERI SUNDARAJOO A/L SOMU  
MENJAWAB BAGI PIHAK YAB KETUA MENTERI**

70. (a) Status terkini projek biogas Kampung Selamat masih di peringkat awal permohonan. Pihak penggerak projek yang dilantik oleh Kerajaan Negeri sedang membuat permohonan kepada beberapa agensi Kerajaan seperti Jabatan Alam Sekitar (JAS) dan *Sustainable Energy Development Authority* (SEDA). Permohonan kepada SEDA melalui Program Tarif Galakan (FiT) hanya akan dibuka mulai Januari 2025. Oleh

yang demikian, permohonan projek biogass di Kampung Selamat hanya dapat dilaksana mulai tahun 2025.

(b) Isu kacau ganggu dari aktiviti penternakan babi merupakan isu rentas agensi yang memerlukan tindakan penguatkuasaan secara bersama dan menyeluruh antara beberapa agensi kerajaan seperti Jabatan Perkhidmatan Veterinar Negeri Pulau Pinang (JPVPP), Jabatan Alam Sekitar (JAS), Jabatan Pengairan dan Saliran (JPS), Majlis Bandaraya Seberang Perai (MBSP) dan lain-lain yang terlibat mengikut bidang kuasa dan perundangan masing-masing. Antara tindakan yang sedang dan akan dilaksanakan ialah seperti berikut:-

(i) Pihak penggerak projek telah mengadakan beberapa siri pertemuan dengan penternak-penternak di Kampung Selamat dan para penternak telah menyatakan komitmen sepenuhnya untuk membekalkan najis-najis kepada pihak penggerak projek sekiranya projek biogas Kampung Selamat dilaksanakan kelak;

- (ii) Pihak Penggerak bersetuju untuk mengambil bekalan najis di ladang Kampung Selamat untuk di bawa ke Projek Biogas di Ladang Valdor, Seberang Perai Selatan sementara menunggu pelaksanaan Projek Biogas Kampung Selamat. Walau bagaimanapun, langkah ini masih belum dilaksanakan kerana pihak penggerak projek dan para penternak Kampung Selamat masih berbincang mengenai pembiayaan kos pengangkutan sekiranya langkah ini dilaksanakan;
- (iii) Kerajaan Negeri melalui JPVPP sentiasa melakukan pemeriksaan dan pemantauan secara berkala melalui Penguatkuasaan Enakmen Perternakan Babi 2016; dan
- (iv) Kerajaan Negeri melalui MBSP turut melaksanakan tindakan seperti berikut:-
  - (1) Majlis menjalankan pemantauan, pemeriksaan dan penguatkuasaan ladang secara rutin dan berdasarkan aduan. Pemantauan dan penguatkuasaan yang lebih intensif dilakukan

terhadap ladang yang dikategorikan sebagai ladang berkeutamaan tinggi (*high priority*);

- (2) Penetapan syarat yang lebih ketat dalam pelesenan premis MBSP;
- (3) Pengeluaran notis, kompaun dan tindakan mahkamah di bawah Akta kerajaan tempatan 1976 serta undang-undang kecil yang berkaitan terhadap sebarang ketidakpatuhan; dan
- (4) Penyelarasan tindakan penguatkuasaan secara bersepadu dan berganda (*double action*) dengan pihak JPVPP yang menguatkuasakan Enakmen Penternakan Babi 2016 dan Peraturan-Peraturan Pelesenan Penternakan Babi.